

遼東三家集

建東三子集

看雲聽濤

館詩

孟錫珏題

劉東閣先生小傳

懷德 榮文祚

劉先生春煥字東閣又字冬葛承德人後析爲新民府治幼穎慧弱冠補弟子員文名藉甚同治癸酉登選拔光緒壬午領鄉薦五上春官不第雖壯志未灰而年已垂垂老矣先生家素饒先公以商業起家設有酤肆先生經其處謂執事曰以君所用麴糧吾易法製之可多得酒百餘觔執事搖首於是先生盡逐其舊人而別募新班有不聽號令者出之果得酒如所計數柳河溝新民境內巨害也連年浸漲先生籌畫地勢畚鍤兼施前後十餘年無水患初先生歲試與先兄可民遼陽房仲

南同受知於張霽亭宗師一時有三才子之目經史詞章之外尤注重於兵學著有礮學一書洞幽達微窮極蘊奧皆前人所未發西人咸歎服焉李公秉衡巡閱長江水師特疏薦舉以爲學徵實用時局日非先生已高卧不起矣先兄交頗廣而與先生及房公交最密書牘往還歲輒寸許余幼年深寶之迨服官後遺失殆盡惟字跡猶存一二然亦鳳毛麟角矣乙巳厲藩垣病卒年五十六子三人次繼荀號實立最端謹惜不祿聞之先兄曰先生有異相以雙手攫食物而橫貫以口狀類猿者爲人淵穆自喜語多風趣讀書目數行下力能深入

所爲文亦踈宕有奇氣昔人謂袁隨園爲黠蒼山仙猿
化身然早入清華遂膺民社晚歲文名溢於海內乃知
人生所得固各有不同爾

看雲聽濤館詩

卷一

登廣甯東嶺

慈航寺遠眺

遊閭山

秋柳

和貽上韻

步仲南秋柳韻

重九日瀋陽城樓

醉白圖爲王甲臣題

千山勝蹟

題畫作

聽角行

金州城

山海道中聞捷作

次繆東麟題壁原韻

再次前韻

瀋城雜詠

二首

春柳詞寄可民

三十六首

落花

有叙
二十八首

談禪雜詠

四十三首

杏林春燕圖 六首

看雲聽濤館詩

新民劉春煒東閣著

登廣甯東嶺

縱酒登高愧賦才
紅荆籬外小門開
菜花成畝黃如繡
樹色籠城綠欲來
朝市滄桑陵谷變
鐘魚朝暮古今哀
無情最是前溪水
獨照斜陽浣碧苔

慈航寺遠眺

瑤草琪花小洞天
藤蘿百丈石如船
耳根寂後猶聞磬
目力窮時僅辨煙
振袖恐隨山影落
登高方識地形圓
摩挲斷碣尋殘篆
為訪前朝創建年

峭壁危懸萬象低，振衣直上與雲齊。
空煙滿地從何起，斜照留人未忍西。
佛守荒庵巢燕入，花開絕澗野禽啼。
生平雅負看山興，掃徧蒼苔不敢題。

把酒登高酹落暉，下方城郭認依稀。
蒼苔被磴青無縫，禾黍浮天綠作圍。
蠻觸紛紜原一族，烏鳶強弱欲何歸。
慈航利用須宏濟，豈合煙帆老翠微。

遊閭山

探幽閒出郡西門，塞下秋風落葉繁。
山果飄紅深澗底，晚菰留翠遠峯根。
路經危坂身頻仰，天小邊洲勢欲吞。
西上招提三百寺，雲中縹緲是宮垣。

崇椒別殿入雲深翠蓋當年岵蒞臨亭對崧呼山並壽
詩從邠繪雅同音空林仙去寒苔濕綺閣暉含落照沉
不向離宮誇壯麗端知禹儉是天心

孤城一片日平西憑眺蒼茫意轉迷萬井煙開平野盡
四山雲壓女牆低中年情性應陶寫初到林巒易品題
欲問遼王舊宮殿劫灰如夢亂鴉啼

荒祠俎豆幾經新石上蒼苔思古春斷碣花沉埋鳥篆
長廊松偃蛻龍鱗雲封澗口深藏寺山出城頭遠瞰人
我向生公尋妙諦羣峯面目果誰真

秋柳 和貽上韻

江潭搖曳盡銷魂，又向西風怨玉門。
樓上翠寒思婦袖，襟邊黃暈酒人痕。
荒城極浦一聲鴈，落日歸鴉無數村。
試問梁園舊庭樹，南朝煙雨忍重論。

姑蘇城外萬條霜，秋盡江南第幾塘。
獨有將軍搔白髮，早令詞客悔青箱。
逢迎人世羞陶令，管領春風負漢王。
落葉蕭蕭那可數，黃驄愁過碧雞坊。

津亭無復挽征衣，回首青樓舊夢非。
謂爾多情應濩落，向人顰黛總依稀。
愁令翠燕和煙織，忍見棲烏背葉飛。
寄語章臺諸女伴，舞腰待試主恩違。

疏枝瘦影劇堪憐，冷眼初醒別後煙。
東道青袍遲進酒，

西樓盧婦懶裝絲未應庾信工愁賦好對桓溫說暮年
我欲盡消紅葉恨株株栽向御溝邊

步仲南秋柳韻

武昌城外漢江南客路蕭條禿髮毳舊日新亭對名士
只今瘦影泣寒潭明知去鴈難為別未到啼鳥已不堪
若過洞庭休寄訊飄零已任楚人談

重九日瀋陽城樓

搔首不可問重陽始何年登城望東北漠漠山川連涼
風起朝曦躍躍金輪圓一躍碧星曙再躍丹霞鮮微微
辨闌闌浩浩人摩肩帝陵秋正深長袖清光延寒鴉起

遠天盤上浮圖巔不知塔何所但見煙中懸世界萬封
蟻强者為烏鳶蠢靈同吾族欲拯愁無緣又無羨門術
白日飛金仙仰天百感集落木正蒼然

醉白圖為王甲臣題

酒星飛落瑤光紫云有神仙作才子長安貴人不知名
沉醉金門招不起甕頭春色澄江波湘陰笛裂梅花多
壺中天大日月小涼風吹灩金巨羅醒來步上華清殿
笑脫烏鞞常侍喚遶字金箋樂府章煙花夜月沉香宴
見客朦朧眼不青一生低首謝公亭草罷新詩鬼神泣
朗吟下告龜龍聽歸來華嶽捫星斗高取銀河盥雙手

酒香隨波落人世一夕長江化為酒旁客
惟看宮錦袍
金陵南下月輪高何當一上蓬壺頂
手把珊瑚釣六鼇

千山勝蹟

長白縣亘千餘里蟠至千山石飛起
幸有罡風削玉蓉
不然直插青天裏化工到此生面開
盡呈奇技風雨來
暉陰朝夕千萬變葱蘢佳氣何雄哉
振衣岡頭石欲裂
龍泉飄練灑晴雪恠風吹松鱗甲舞
綠海連天色明滅
當年華表浮雲間一千年鶴旋飛還
仙人棋罷幾經劫
祇今故鶴飛空山遼王宮殿今安在
朝市滄桑雲不改
願携驚人好句來佛頂峯頭訴真宰

題畫作

大丈夫生不得伯樂作知己埋頭且入神仙裏神仙終
日酒中天君不見賀氏季真李青蓮青蓮酒酣上馬去
季真酒醉落馬眠何論五花驄何論鐵連錢我醉擎杯
月滿手呼童將換金花酒從來飲客異健兒得駿馬千
不如得葡萄斗沛君畫懨今時無名士名馬摹為圖一
夔老子古未考好酒便是神仙徒腰下鐵錫杖背後銅
葫蘆醉蹋天河長洗脚東吸大海吞蓬壺噫吁乎騰駕
疲牛驥垂耳皮相者多固如此蘭筋伏櫪鳴向天飲中
之人笑倒矣世間萬事浮雲浮三杯以下誰王侯不願